

't Herenhoentien



BESTE KIENDER!

Hebben jim ok zoe'n zin an de zomervekaansie? Now, wi'j wel! Mar gelokkig duurt et niet lange meer, dan pakken we oonze koffers en gaon d'r lekker een posien vandeur. Gaon jim allegere vot of bin d'r ok goenend die de vekaansie thuus vieren? Dat kan vanzels krek lieke best. Ie kun je thuus ok allemachtigen best vermaecken, of niet dan. In zoe'n mooie lange vekaansie koj' temeensen eindelijk es an dingen toe daor aandere meerstal niks van komt. Hoe dan ok, wat jim ok doen gaon; geniet d'r van, wi'j hopen daj'm een prachtvekaansie kriegen!

In dit *Herenhoentien* staot weer, krek as aandere, een verhaeltien over Piepmoes. Piepmoes gaot in et ni'je verhael an et voetballen. Een hieleboel van zien kammeraoden doen mit, mar de katten vanzels niet. Die kuj' bi'j zokke dingen niet bruken. Mar zollen ze in et verhaeltien dan hielemaole niet veurkommen...? Lees of luuster mar es gauw!

Aachterop et kraantien staot een klein spullegien. Klaos de kaeter perbeert Piepmoes te pakken, mar wet niet welke weg hi'j nemen moet... Jim wel?

Bi'j et kraantien zit dit keer een kleurplaete. Mit Piepmoes d'r op. Jim kun die op schoele kleuren, mar thuus kan ok. Misschien is d'r wel es een regenachtige dag in de vekaansie en dan hej' et mooi an tied. Now ja, jim moe'n mar es zien. Tot de volgende keer!



***Ok Piepmoes en zien kammeraoden
weensken jim een fijne vekaansie toe!***

't Herenhoentien is veural bedoeld veur groep 1, 2, 3 en 4 van et basisonderwies in de Stellingwarven en vershient vier keer in et jaor. Et wodt bedocht, saemensteld en klaormaekt deur Saskia Douma en Sietske Bloemhoff, in opdracht van de Intergemientelike Begeleidingsgroep Hiemkunde in Oost- en West-Stellingwarf.

PIEPMOES GAOT VOETBALLEN

(Een veurleesverhael van Sietske Bloemhoff)

Op een zommeraovend zit Piepmoes in de bos mit een peer van zien kammeraoden te praoten. Ze zitten, om percies te wezen, onder de grote boom op et eupen plak. In de winter is de boom mit de kastdaegen altied prachtig versierd, weten jim nog wel? Mar now niet, netuurlik. Now is et krek zoe'n boom as alle ere sparrebomen in de bos.

Op et eupen plak bin een hieleboel jonge dieren drok an et speulen. Een peer jonge haezen doen haasje-over, een stel knienegies is drok an et knikkeren en een stok of wat jonge voegels bin an et touwgien springen. Mit mekeer hebben ze een protte wille, dat zij' begriepen!

Piepmoes en zien kammeraoden zitten d'r mit plezier naor te kiekken.

'Wi'j kun douk ok wel even een spullegien doen,' vint et roodbossien. 'Ik heb d'r ok wel nocht an om me even uut te vliegen.'

'Now, en aandere ikke wel,' zegt de gelegouw. 'Et het de laeste daegen aorig waarm west, en dan doe'j niet zo vule. Dan is et as et wat koeler is wel lekker om je weer es evenpies flink te bewegen.'

Piepmoes is et d'r hielemaole mit iens. 'Ik hebbe d'r ok nocht an om wat spullegies te doen. Misschien bin d'r nog wel meer beesten die mitdoen willen. De protter misschien wel, en Diedel en Daweltien.'

'Aj' et over de duvel hebben,' gniest de doeve die d'r vanzels ok bi'j zit, 'trap ie him op zien stat. Kiek mar es even wie as daar an biezen kommen. De honnen. En ze lieken wel dweildeurnat. Tsjonge, jonge, wat zien die beide gekken d'r uut.'

'Hee, Diedel en Daweltien,' ropt et roodbossien, 'wat hebben jim in de vredesnaeme daon. Hoe kommen jim zo nat, et het ja in gien tieden regend.'

'Of het jim baos jim onder de douche had,' sjilpt de gelegouw.

'Welnee,' blaffen de beide honnen, 'wi'j hebben krek even lekker zwommen in de Lende. En doe dochten we, we kun nog wel even op et eupen plak kiekken as daar nog wat te beleven vaalt. Wat bin jim aenlik an et doen?'

'Now,' zegt Piepmoes, 'wi'j zollen krek wat spullegies doen. Tikkertien, of overstikkertien of een spullegien mit de balle. Waor hebben jim zin an?'

'Weej' wat ik graeg willen zol,' keft Diedel, 'ik heb d'r hatstikke vule zin an om een pottien te voetballen. Wi'j hebben laest zowat alle wedstrieden van et EK zien. Oonze baos is gek op voetballen, hi'j zit zels ok bi'j een voetbalclub. Dus hi'j keek de hieltied, en daarom hebben wi'j d'r ok een protte van zien. Om zels te voetballen liekt oons prachtig, hen, Daweltien?'

'Ja zeker,' antwoordt Daweltien. 'Soms speulen wi'j op et hiem wel es mit een oolde balle, mar echt voetballen hebben we nog nooit daon. Mar dat kan hier wel. Hebben jim wel een balle?'

'Jaowel,' koerkt de doeve, 'ik heb wel een iene, ik hael him vot-en-daolik op.'

Daor vligt de doeve al henne. De ere dieren zitten, zo lange ze waachten moeten, wat mit mekeer te praoten. Over hoe ze voetballen gaon, wie as d'r in et doel moet en wie verdedigt en gao mar deur.

'Hoevule speulders hej' aenlik neudig veur een pottien voetbal,' vraagt Piepmoes inienend. 'Dat weten jim vanzels wel, Diedel en Daweltien.'

'Elke ploeg het elf speulders,' antwoordt Diedel. 'Tiene in et veld en iene in de goal.'

'Mar dan hewwe nog lange niet genoeg,' schrikken et roodbossien en de gelegouw. 'Tel mar. Wi'j mit 'n beidend, Piepmoes, de doeve, Diedel en Daweltien, de protter en de molle. Meer kuwwe niet bedaenken, zo ien-twie-drie.'

'Misschien wil Kukel de haene ok wel mit doen,' bedaenkt Piepmoes. 'En de kikkerd, dan biwwe al mit z'n tiene. En as we now es ien van die haezen vraogen. Die kun hatstikke hadde lopen.' De dieren vraogen een haesien en dat wil wel. Mar hi'j wil wel graeg dat zien beide vrunties ok mitdoen kunnen en ok de knienegies die an et knikkeren binnen. Dat bin ok vrunties van him.

‘Dat kan best, want we moe’n toch ok een peer wisselspeulders hebben,’ zeggen de beide honnen. ‘Mar we hebben nóg een perbleem. We moe’n een tegenperti’j hebben. En waor vienen we die. En een scheidsrechter moet d’r ok bi’j.’

‘Ik wil wel scheidsrechter wezen,’ zegt de doeve, die intied de balle ophaeld het. ‘En ik zorg wel veur een tegenperti’j. Ik haele zomitiën Kukeltien op en onderwegens kom ik deur de bos daor de gelegouw hiel vroeger woonde. Daor wonen een hieleboel aorige dieren en die doen vast mit. Now, ik gao mitien, zorgen jim veur et veld?’

Een uurtien laeter is alles klaar. De doeve is d’r weer, tegere mit Kukel die et uutkri’jt van plezier en de tegenperti’j is d’r ok al. Et veld ligt d’r prachtig bi’j. Piepmoes en zien maoten hebben blauwe shirts an en de ere perti’j rooien. Dan blaost de scheidsrechter op et fluitien. De wedstried kan beginnen. De dieren van de tegenperti’j gaon d’r mitien vandeur mit de balle. As midveur hebben ze een reë en die kan verschrikkelijk hadde lopen. As hi’j vlak bi’j et doel is en de balle die kaante op schopt, springt gelokkig de kikkerd mit een geweldigen sprong omhogens en kopt de balle hadde de ere kaant op. Daor komt Diedel an. Hi’j kan ok hadde. Moej’ die hond lopen zien. Mit een handige tik schopt hi’j de balle naor Kukel die him mit een veurzettien deurtrapt naor Piepmoes die hielendal vri’j lopt! Piepmoes schopt zo hadde hi’j kan tegen de balle, en... goal! Ien-nul veur Piepmoes en zien kammeraoden. Et is een prachtige wedstried en et gaot aorig liek op. Daweltien die in et doel van Piepmoes-en-die staot lat de balle al een peer keer deur, mar gelokkig de ere kieper ok.

As et pauze is, is de staand drie-drie. Et blift spannend, mar de scheidsrechter zegt dat ze eerst wat mit mekaander drinken gaon. De beide peri’jen kun meraokel mit mekeer opschieten, mar nao een kertiertien gaot de wedstried weer deur. Tjongejonge, wat kun die dieren allegere goed voetballen. Allierend de molle lopt wel es de verkeerde kaante op, mar ja, die kan ommes niet zo goed zien. Now ja, dat hindert niks vienen zien kammeraoden, iederiene moet mitdoen kunnen. En dan kieken zi’j ja wel wat beter. Mar as zi’j now alles wel zo goed zien... Ja, wat d’r óp et veld gebeurt wel, mar wat d’r náóst et veld an de haand is...

Aachter een peer kleine sparreboompies loeren vier ogen. Grune ogen. Katte-ogen, vanzels. Jim weten wel wie et binnen. Klaos de kaeter en Miep, zien vrundinnegien. De beide katten laggen argens noflik te slaopen doe ze een boel kebaol heurden.

‘Wat zol dat wezen, Klaos,’ knipoogt Miep tegen de kaeter.

‘k Weet niet,’ mompelt Klaos, ‘en ie moe’n me niet altied wakker maeken a’k slaop.’

‘Wanneer moe’k je dan wakker maeken, oolde sloegkop,’ foetert Miep. ‘Ik kan je ja allierend mar wakker maeken aj’ slaopen!’

Klaos kikt Miep es gremietig an. Nuvere tutte, daenkt hi’j, mar hi’j zegt et mar niet. Eers hebben ze weer ruzie. En al die geluden klinken naor dieren. Grote dieren, mar ok kleine dieren, en dat bin vast lékkere dieren... Moezen, bi’jglieks.

‘D’r op of, Miep,’ mauwt Klaos. ‘Misschien kuwwe wel een lekker stokkien vleis pakken.’ Klaos is now springlevend. En zo sloepen de katten de kaante van de geluden op.

‘Moej’ now kieken,’ blaost Miep. ‘Al die lekkere happies bin an et voetballen. En ze zien vanzels niks eers as de balle. Wi’j hebben veur et kiezen, Klaos.’

‘Zeg dat wel,’ bromt Klaos. ‘Ik geloof da’k eerst Piepmoes mar es pak. En a’k die op heb, de protter. Of za’k krek eersomme...’

‘Ik lüs aandere Piepmoes ok wel,’ mierkt Miep. ‘Ik bin gek op moezehappies, waarom moet ie altied de moes.’

‘Altied,’ gromt Klaos, ‘we hebben him ja nog nooit pakt, dom deusien daj’ binnen. Mar veuruit, dan dielen we him. Dan kriegen we elk de helte. Mar let op, want daor komt hi’j krek weer an draeven. We griepen him in ienkeer en maeken dat we votkommen. As we dan op een rustig plakken kommen, eten we him heerlijk op.’

Et liekt niet best veur Piepmoes. Hi'j het vanzels nargens gien euvelmoed in en is van plan om nóg een doelpunt te maeken. Mar as hi'j vlak bi'j et doel is, vliegen inienend de beide katten et veld op en zullen him griepen.

'Help, hellup,' raost et aarme moesien. 'De katten willen me pakken, help, help.'

Et liekt niet zo best. De katten hebben Piepmoes haost bi'j zien voetbalshirt vaaste. Mar dan komt inienend de ree van de tegenperti'j d'r an en buugt him veurover. Et bliekt dat hi'j een gewei het. Daor had hi'j de hietied hiel veurzichtig mit west, want hi'j was bange dat hi'j de balle d'r wel mit lek stoten kon. Mar now durft hi'j et wél te bruken. Dat et reebokkien stoot mit et gewei naor veuren en prikt eerst Klaos percies in zien achterwark. De kaeter jammert en raost et uut en vligt zo hadde hi'j kan van et voetbalveld of de bos in. Dan dri'jt et bokkien zien kop naor Miep en zal die katte ok een beste por geven. Mar Miep zicht et geveer op 'e tied en vligt achter Klaos an. Die beide kommen de eerste tied vast niet weer in de buurt!

Dan fluit de scheidsrechter weer op et fluitien. Hi'j vint dat nao die vervelende onderbreking de wedstried toch nog even uutspeuld wodden moet. D'r kommen nog een peer doelpunten, mar et blift uiteindelijk mit vuuf-vufe geliekspel.

Gieniene vint dat echt arg. 'Weej' wat we doen,' stelt de doeve veur. 'Dommiet speulen we wéer een wedstried tegen mekeer. Mar dan kommen wi'j wel naor jim bos toe, want dan hebben we te-meensen gien last van de beide katten!'

Welk lijntien kan Klaos
et beste volgen om
Piepmoes te pakken; 1,
2 of 3?



1
2
3



